

## لازم نجيب حقوق المرأة

كثير من اللي بيتكلموا عن حقوق المرأة وبيدافعوا عن "الأسرة" المصرية..  
مبيتكلموش عن حقوق المرأة.. ولا يهتمهم الأسرة في حاجة..  
عايز دليل طبعاً.. تحت أمرك..

**الدليل إن محدش فيهم يناقش المشاكل الحقيقية اللي بتواجه المرأة والأسرة..  
وتعالا نتكلم بالأرقام..**

..

في سنة 2015 ذكرت إحصاءات رسمية

إن المحاكم المصرية قصادها 14 مليون قضية طلاق..

يعني في 28 مليون مواطن بيطلقوا!!

يعني تقريبا ربع سكان مصر! إنتم مدركين الرقم.. 14 مليون قضية!!

في سنة 2021 لوحدها اترفع 255 ألف قضية طلاق..

ربع مليون قضية في سنة.. ده غير اللي اطلقوا من غير قضايا..

وفي سنة 2019 بس.. اتحكم بشكل نهائي في 10 آلاف قضية خلع.

دي كلها إحصائيات رسمية..

يعني مع كل مشاكل الأسرة والمرأة في مصر دي..

شباب وبنات بيتطلقوا بعد سنوات زواج قليلة..

وأغلبهم بيعيش في قرف وإجراءات ومحاولات انتقام!

وأطفال بريئة بتقع ضحية في النص وتعيش في تعاسة بعيد عن جو أسري..

هم سابوا المصايب دي بقي.. ولخصوها

في إن المرأة في مصر مش مجبرة ترضع ابنها!

ولا مجبرة تطبخ لجوزها وعيالها!

ولا مجبرة تغسل وتروق بيتها قبل ما يكون بيت أي حد تاني!

طيب صحيح.. عندكم هي مش مجبرة..

بس طبعاً المرأة في مصر مجبرة على حاجات تانية..

مجبرة تكون عانس..

في أكثر من 11 مليون بنت عدت سن الـ 30 ومتجوزتش..

دي إحصائية قديمة جداً على فكرة.. من سنة 2018..

وغالباً الرقم الآن أكبر بكثير..

يعني الست في مصر مجبرة تكون عانس..  
واللي تفلت منهم وسط الغلاء والأسعار والبطالة والقرف..  
وتعرف وتقدر تتجوز..  
ويكون ليها سند.. وتكون لجوزها سند..  
يتشاركوا سوا الحاضر.. يكونوا أسرة.. يكون ليهم أطفال.. فيكون ليهم  
مستقبل..  
تلاقي دول نطوا عشان يعكننوا عليهم حياتهم..  
المرأة في مصر  
ملزمة تكون فقيرة!  
ملزمة تكون جاهلة!  
مجبرة تكون مريضة!  
ومجبرة تكون في قاع القاع!  
لكن لما تحط إيدها في إيد شاب..  
ويبدأوا حياتهم.. ويشقوا طريقهم سوا  
فبدل ما نسكت ونحط جزمة في بوقنا  
لأ! إحنا هنغص عليهم حياتهم!

وبدل ما المجلس القومي للمرأة يشتغل إنه يلاقي حل للعنوسة

يلاقي حل لزيادة حالات الطلاق لا إزاي..

يلا نهري في أي كلام..

تحت شعار الدفاع عن حقوق البنات والمرأة المصرية.

والله؟ بجد؟

..

كنتم فين ساعة جريمة رجل الأعمال محمد الأمين

اللي تمت ضد بنات قصر يتيمات..

كنتم فين ساعة المحاكمة طيب..

مسمعناش صوتكم ليه!

هم دول مش بنات.. وحصل ضدهم انتهاكات!

ولا الست المصرية في عرفكم مجبرة تكون تحت أمركم ورغباتكم وبس!